

Home > AIMERIC DE PEGUILHAN > EDIZIONE > Li fol e·ill put e·ill fillol > Edizioni > Shepard-Chambers

Shepard-Chambers

I.
Li fol e·il put e·il filol
creison trop e no m?es bel;
e·il croi joglaret novel,
enojos e mal parlan,
corron un pauc trop enan;
e son ja li mordedor,
per un de nos dui de lor,
e non es qui los n?esqerna.

II.
Greu m?es car hom lor o col
e non lor en fai revel.
Non o dic contra·N Sordel,
q?el non es d?aital semblan
ni no·is vai ges percassan,
si co·il cavallier doctor;
mas qan faillon prestador,
non pot far cinc ni sieis terna.

III.
Lo marques part Pinarol,
que ten Salus e Revel,
non vuoill ges que desclavel
de sa cort ni an loignan
Persaval, que sap d?enfan
esser maestre e tutor,
ni un autre tirador,
qu?eu no vuoil dir, de Luserna.

IV.
Aitals los a cum los vol,
lo marques, Ençantarel,
Nicholet e Trufarel,
que venon ab lui e van,
e non del tot pel lor dan.
Be·is son trobat d?un color:
aitals vassals tal seignor!
Dieus lor done vita eterna.

V.
Ar veiretz venir l?estol

vas Malespina e·l tropel,
don an la carn e la pel;
et ades on pieitz lor fan,
e meins de merce lor an.
Trop son lo combatedor
e pauc li defendedor:
mort son si Dieus no·ls governa.

VI.
Estampidas e romor
sai que faran entre lor,
menassan en la taverna.

- letto 262 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/shepard-chambers>